

ሆሴዔ ዓይያ ካር

የኦሲ ማሊያ ኬኤዜ ሆሴዔ ኪሪብቶሴ ሾይነታንዳሢኮ ቤርታ ሳማሪያ ካታማ ላንካይ ጃኤታና ላማታሚ ፔቲ ሌዔይዳ ሻሂንታንዳሢኮ ቤርታ የኦሲ ማሊያ ኬኤዜ ማዴ ዓሲኬ። ዬኖ ዎዶና ኮሺ ሜቶ ዎዴታንቲ የኦሲ ማሊያ ኬኤዜ ዓሞፆፓ ሄሊሳየ ዒሰራዔኤሌኮ ኬዴኖ ካኣቶ ዓጮይዳ የኦሲ ማሊሢ ዒዚ ኬኤዜ። ሆሴዔ ዒማና ዴራ ሜሌ የኦዞ ካኣሽኪ የኦሲም ጉሙርቁንቲባኣያ ማዒያ ዛሎ ኮሺ ዶዲሺ ኬኤዜ፤ ዒዚ ዴርኮ ዬያ ጉሙርቁንቲያ ባይሱሞ ፔጋሲ ዔርዛኒ ጉሙርቁንቲዎያ ማዔ ጎሜር ጎየ ላኣሊሰኬና ዒዛኮ ኮኣኪንሢ ማሂ ጌሰቲ፤ ዬና ላኣሌላ ዒዛም ጉሙርቁንቲባኣያ ማዔሢጉዲ ናንጊና ናንጋ ጎዳኮ ዴራ የኦሲም ጉሙርቁንቲ ናንጊያ ሃሼ፤ ዬያ ዛሎና ሜታ ዒሰራዔኤሌ ዓሶይዳ ሙካንዳሢ ዒዚ ኬኤዛ፤ ዬይ ያዲ ማዔቲያ የኦሲ ፔኤኮ ዴር ናሽካ፤ ጋፑዋ ናሹማ ኮሺ ዶዲ ማዔሢር ዴር ዒዚ ፔ ባንሢ ማሂ፤ ዒዛና ዒዛኮ ዴርና ባኣካ ዓኣ ፔቱሞ ጊንሢ ዓካሳንዳሢ ሆሴዔ ኬኤዜ፤ ዬይ የኦሲኮ ዴኤፖ ናሹማ ዓይ. 11:8ይዳ «ዒሰራዔኤሌ! ታኣኒ ኔና ዎይቲ ኬኤራንዳይ? ዎይቲ ታ ኔና ሜሌም ዓኣሢ ዒንጋንዳይ?... ታ ኔና ናሽካ ናሹማ ኮሺ ዶዲ ታሢር ዬያ ቢያ ታኣኒ ማዲዋጉዲ ታ ዒና ታና ባሼ፤!» ጌይነቲያና ፔጋዲ ዔርቲ።

ማፃኣፔላ ዲማ ዲማ ዓርቂ ባኮ

ሆሴዔ ዔኬ ላኣሌሎና ናኣቶና ጉሙርቁንቲዎያ ማዔ የኦሲ ዴርኮ ኮኣኪንሢ ማዒያ (1:1—3:5)

የኦሲ ዒሰራዔኤሌንታ ዪሁዳንታ ዔያቶኮ ሱኡጎዋ ዞሪ ጎሬያ ማዒያ (4:1—5:15)

ዴራ የኦሲ ባንሢ ማዔያ ማሊሲ ጌሼ ጌሺያ (6:1—7:12)

ዒሰራዔኤሌ ዴራ የኦሲ ጉሙርቁያ ሃሼሢ (7:13—8:14)

ዒሰራዔኤሌ ዴራ ኮይሳያ ማዔ ሜቶ ዔካንዳያ ማዒያ (9:1-17)

ዒሰራዔኤሌ ዴራ ዔራንዳጉዲ ላቲ ኬኤዚንቲ ባኮ (10:1-15)

የኦሲ ፔኤኮ ዴር ናሽካ ናሹሞ (11:1-11)

የኦሲ ፔ ዴር ዑፃ ዎጌ ዎጎ (11:12—13:16)

ጎማ ዓቶም ጌይነታንዳሢና ዓንጀዋ ሙካንዳያ ማዒያ (14:1-9)

ሆሴዔከ ማጥንታ ናኣቶንታ ኮኣከንሢ ማዒ ኬኤዚንቲሢ

1 ዪሁዳ ዓጮይዳ ፆኦዚያ፡ ዒዮዓታሜ፡ ዓካኣዜንታ ሂዚቂያሴንታ ዋሊ ሄሊሲ ካኣታጅ ዋዶና ሲያ፤ ዬያጉዲ ሃሣ ዮዓሴ ናኣዚ፡ ዒዮርቢዓሜ ዒሰራዔኤሌ ዓጮ ካኣታጅ ዋዶና ናንጊና ናንጋ ጎዳ ቢዔሪ ናኣዚ ሆሴዔም ፔጋሲ ኬኤዜ ቃኣላ ሂዚ ጋዓያኬ።

2 ናንጊና ናንጋ ጎዳ ሆሴዔ ዛሎና ዒሰራዔኤሌ ዴሮም ፔኤኮ ቃኣሎ ኬኤዚያ ዓርቃያ ሆሴዔም፡ «ታኣኮ ዴራ ታና ሃሺ፡ ሻኣካያ ማዔ ዘኣሰካ ኮኣሞ ኮኣሚሢ ዓርቄኔ፤ ሃሢ ኔኤኒ ዴንዲጋፓ ዘኣሰካ ኮኣማ ላኣሊ ዔኬ፤ ዬያይዲ ዘኣዜ ናይ ሾዔ» ጌዔኔ።

3 ዬያር ሆሴዔ ዴንዲ ዲቢላዬ ናዎ፡ ጎሜር ጎዮዘ ዔኬኔ፤ ዒዛ ጎጳዲ ዓቲንቄ ናይ ሾዔኔ።

4 ዬካፓ ናንጊና ናንጋ ጎዳ ሆሴዔም፡ «ዒዩ ዒይዚራዔኤሌ ዶኦጮይዳ ዋጅ ዓሶኮ ሱጉያ ማሃኒ ዒዛ ማኣር ዓሶይዳ ሜቶ ታኣኒ ዓጋንዳ ዋዳ ሃኬ ማዓዓኬ፤ ዒሰራዔኤሌ ፔ ካኣቲ ዓጪ ማዒ ናንጋ ናንጎዋ ታኣኒ ባይዛንዳኔ፤ ዬያር ዬያ ናማኮ ሱንያ ዒይዚራዔኤሌ * ጌይ ጌሢ» ጌዔኔ።

5 ዬማና ዒይዚራዔኤሌ ዶኦጮይዳ ዒሰራዔኤሌኮ ያሎ ዓሶ ዋዲ ታኣኒ ኩርሳንዳኔ።

6 ጎሜራ ሃሣ ጎጲ ዔኪ ዉዴር ናይ ሾዔኔ፤ ናንጊና ናንጋ ጎዳ ሆሴዔም፡ «ሃይካፓ ሴካ ዒሰራዔኤሌ ዴር ሚጪንቲ ታኣኒ ቲኢራዓኬ፤ ዳቢንቶዋ ታ ዔያቶም ዓቶንጎ ጋዓዓኬ፤ ዬያር ኔኤኮ ናዮ ሱንያ ሎሩሃማ† ጌይ ጌሢ ጌዔኔ።

7 ዪሁዳ ዴር ጋዓንቲ ሚጪንቲ ታኣኒ ቲኢራንዳኔ፤ ታኣኒ፡ ናንጊና ናንጋ ጎዳ ማዔ ዔያቶኮ ፆኦዛሢ ዔያቶ ዓውሳንዳኔ፤ ታኣኒ ዔያቶ ዓውሳንዳሢ ያልዚናቱዋሴ፤ ጩንቻ ዓራፖ፡ ሂኢሺ፡ ዬያጉዲ ፓርንታ ፓርና ያላ ዓሰናኣ ያሊቱዋሴ» ጌዔኔ።

8 ጎሜራ ሎሩሃማ ጉኡጲሼሰካፓ ጊንሣ ጎጲ ዔኪ ዓቲንቄ ናይ ሾዔኔ።

9 ናንጊና ናንጋ ጎዳ ሃሣ ሆሴዔም፡ «ሃይካፓ ሴካ ዒሰራዔኤሌ ዴራ ታኣኮ ዒጊኒቱዋሴ፤ ታኣኒያ ዔያቶኮ ፆኦሲቱዋሴ፤ ዬያር ኔኤኮ ናኣዚ ሱንያ ሎዓሚ‡ ጌይ ጌሢ» ጌዔኔ።

1:1 2ካኣቶ. ማ 14:23—15:7፤ 15:32—16:20፤ 18:1—20:21፤ 2ያኦሲ. ዓሃኬ 26:1—27:8፤ 28:1—32:33። *

1:4 ዒይዚራዔኤሌ፡ ጌይ፡ «ያኦሲ ዜርቄ ባባይዛያኬ» ጌይሢኬ። 1:4 2ካኣቶ. ማ 10:11። † 1:6 ሎሩሃማ፡ ጌይ፡ «ጎሜ ዓቶም ጌይ ቲኢራሢ ኮይሱዋ ዴሬ» ጌይሢኬ። ‡ 1:9 ሎዓሚ፡ ጌይ፡ «ታ ዴሬ ማዒባኣያ» ጌይሢኬ።

ዒሰራዔኤሌ ዳርሞ ሃጋአ ዋዛ ማሂ ኬኤዚንቴ ባኣዚ

10 ያዲ ማዕቴያ ዒሰራዔኤሌ ዳራ ፓይዲንታኒና ማኪ ዔርታኒ ዳንዳዑዋ ባዚ ማኣሻላጉዲ ሚርጋንዳኔ፤ ሃሂ ያኦሲ ዔያቶ፡- «ዒንሂ ታ ዳሬቱዋሴ» ጌዔቴያ ዒማ ቤዛ ጊንሣ «ናንጊና ባይቁዋናንጋ፡ ያኦሲ ናኣቶ» ዔያታ ጌይንታንዳ ዋዳ ዬዓንዳኔ።

11 ዬኖ ዋደና ዪሁዳ ዳርንታ ዒሰራዔኤሌ ዳርንታ ዋላ ፔቲ ማዓንዳኔ፤ ዔያቶ ለምዓሂ ዋይሣንዳ ፔቲ ሱኡጌ ዔያታ ዶኦራንዳኔ፤ ጊንሣ ዔያታ ፔ ዓጮይዳ ዔርቱያ ማዒ ዳልጊ ያርጎጪ ናንጋንዳኔ፤ ዬና ኬሌላኣ ዒይዚራዔኤሌም ዳኤፒ ኬሊ ማዓንዳኔ።

2

1 ዬያር ዒሰራዔኤሌ ዓሶ ማዔ ዒንሢኮ ጌርሲንሢኮ ሱንያ «ዓሚ»* ጌርንሢ ሱንያ «ሩሃማ»† ጌይ ጌሠዋቲ።

ዒሰራዔኤሌ ዳራ ጉሙርቂንቲባኣሢር ዔያቶይዳ ዓጎና ሜቶ

2 ታ ናይዮቲ፤ ሃይካፓ ሴካ ዒንሢኮ ዒንዳ ታኣኮ ማቸቱዋኣሢር፤ ጊንሣ ሃሃ ታኣኒያ ዒዞኮ ዓኒቱዋኣሢር ዞኦዛ ኮኦሚ ዒዛ ማላ ማለያንታ ሜሌ ዓኒና ዒዛ ላሃ ላሂያ ሃሻንዳጉዲ ዘሪ ዒዞ ጎሩዋቲ።

3 ዒዛ ዬያ ሃሺ ማዒባኣቴ ዒዛ ሾይንቴ ኬሎ ዓኣማ ጎይያ ካሎ ታ ዒዞ ዓይሳንዳኔ፤ ዒርዚ ዋርቁዋ ሳዓ፡ ጉሪ ጉሪ ዳውሌ ታ ዒዞ ማሃንዳኔ፤ ዋኣሢ ዳኤቢና ታ ዒዞ ዋዲሻንዳኔ።

4 ዞኦዜ ላኣሊፓ ናኣታ ዒዞኮ ሾይንቴሢር ናኣቶም ታኣኒ ሚጪንታዓኬ።

5 ዔያቶኮ ዒንዴላ ዞኦሰካ ኮኦማያ ማዔሢር ዔያቶ ዒዛ ሻኣካ ጎይሢና ጎጳዴያኬ፤ ዒዛ ዬያ ማዴሢ «ታኣኒ ሙዓንዳ ሙዖንታ ዋኣዖንታ፡ ሱኡፖና ታልቦ ጎሎና ኮሾና ማኣዓሢንታ፡ ዛይቶንታ ታኣኒ ዑሽካንዳ ዑዠዋ ታኣም ዔያታ ዒንጋያታሢር ታ ላጎ ጊንያ ታኣኒ ዴንዳንዳኔ» ጌይኬ።

6 ዬያር ታኣኒ ጎይያ ዒዞኮ ዓንጊሢና ዲርቃንዳኔ፤ ካራ ዴንቂ ዒዛ ኬሰኩዋጉዲ ካታዋኮ ዙሎ ታኣኒ ሹቹና ኬልቂ ዲርቃንዳኔ።

7 ዒዛ ፔ ላጎ ጊንያ ዓኣዲኒ ዳንዳዓኔ፡ ጋዓንቴ ዒዛ ዴንዳ ዔያቶ ሄላዓኬ፤ ዔያቶ ዒዛ ኮዓንዳኔ፡ ጋዓንቴ ዒዛ ዴንቃዓኬ፤ ዬካፓ ዒዛ፡- «ሃያፓ ታኣኮ ቤርታኣ ናንጎማ ኮሺኬ፤ ዬያር ታኣኮ ቤርታኣ ዓኒ ኮይላ ታ ዴንዳንዳኔ» ጋዓንዳኔ።

1:10 ሮማ 9:26። * 2:1 ዓሚ፡- ጌይያ «ታ ዴሬ» ጌይሢኬ። † 2:1 ሩሃማ፡- ጌይያ «ጎማ ዓቶም ጌይ ቲኤሪ ሃሺንታ ዴሬ» ጌይሢኬ።

8 ታኣኒ ዒዞም ሃኣኮንታ ዎይኖ ዑዠንታ ሪማቶ ዛይቶንታ ዒንጌያታሢ ጋፒ ዒዛ ዋሌኔ፤ ታኣኒ ዒዞም ዬያ ሚርጊሺ ዒንጌ ቢርንታ ዎርቆንታ «ባዓኣሌ» ጌይንታ ሜሌ ያኦዞም ዒንጎ ባኣዚ ማሂ ዒዛ ሸኢሸኔ።

9 ማኣላ ቡሪንታ ዎይና ሃኣኮ፥ ዎይና ካፃ ዎይና ዎይኖ ታ ዒዛይዳፓ ዔካንዳኔ፤ ካሉም ዒዛ ፔኤኮ ዓኣቻ ሱኡፓሢና ታልቦ ጎሎና ኮሾና ማኣዓሢ ታ ዒዛኮ ጉሲ ዔካንዳኔ።

10 ዒዛኮ ዘኣዛ ዎላ ኮኦም ላጎ ቤርታ ታ ዒዛ ካሉ ዓይሳንዳኔ፤ ታ ኩጫፓ ዒዛ ቶሊሲ ዓውሳንዳይ ባኣሴ።

11 ዒዛ ቦንቺ ቦንቺ ዎዛዳ ቦንቺ ኬሎ ቢያ፤ ጌይፃ፡- ሃውሾ ኬሎንታ ሌዓ ሌዓ ቦንቺሢንታ ዓጊኖ ፄኤር ቦንቺሢንታ ታኣኒ ዓይሳንዳኔ፤ ዬያጉዲ ዲማ ዲማ ዒዛ ቦንቻ ቦንቺ ቢያ ቦንቺዎጉዲ ታኣኒ ዒዛ ላኣጋንዳኔ።

12 ዒዛ ፔኤኮ ዎላ ዘኣዛ ኮኦማ ላጎፓ ዔኬኔ ጋዓ ዎይኖንታ ቤሌሶ ሚያንታ ታኣኒ ዒዛኮ ቱጋንዳኔ፤ ዎይኖንታ ዲማ ዲማ ሚያ ዓኣፖ ዒዛ ቱካ ጎዡ ታኣኒ ካይዚ ማሃንዳኔ፤ ዬያ ሚያ ዓኣፖ ካኖ ቦዓ ሙዓንዳኔ።

13 «ባዓኣሌ» ጌይንታ ሜሌ ያኦዞም ዑንጅ ዒዛ ጩቢሺሢሮና ዒዛና ዎላ ዘኣዛ ኮኦማ ላጎ ጊንያ ዒዛ ፓልሚንቲ ዴንዲ ታና ሃሽሢሮ ሜቶ ታ ዒዛይዳ ዓጋንዳኔ፤ ጋዓኔ፥ ናንጊና ናንጋ ጎዳሢ።

ያኣሲ ፔ ዴር ናሽካ ናሹሞ

14 ዬያር ጊንሣ ታ ዒዛ ዓሲ ናንጉዋ ዳውሎ ዔኪ ዴንዳንዳኔ፤ ዒኣካ ታ ዒዛ ናሹሞ ዑኡሲና ጌሺ ታ ባንሢ ማሃንዳኔ።

15 ቤርታ ዒዛፓ ዔኬ ዎይኖ ጊንሣ ታ ዒዛም ማሃንዳኔ፤ ሜቶ ደኣቺ ማዔ ቤዞ ሃጊ ኮሺ ባኣዚ ጴዳንዳ ካራ ታ ዒዛም ማሂ ኮሻንዳኔ፤ ዓካሪ ዒዛ ዒኣካ ሚና ጊብፄ ዓጫፓ ኬሰካኣና ዴጋቶ ዎይና ዓኣ ጎይያ ማዒ ዎዛና ዓይኡም ዓይናዳንዳኔ።

16 ዬኖ ኬሎና ዒዛ «ዒኒዮ!» ጌይ ታና ዔኤላንዳኔ፤ ባዓኣሌ ጌይንታ ሜሌ ያኦዞ ዒዛ ዔኤላ ጎይያ «ታ ጎዳ!» ጌይ ዒዛ ታና ዔኤላዓኬ።

17 ዒዛኮ ዳንጋፓ ባዓኣሌ ጌይንታ ሜሌ ያኦዞ ሱንያ ታኣኒ ባይዛንዳሢሮ ዔያቶኮ ሱንያ ጳቂሢ ዒዛ ዔኤላዓኬ።

18 ዒንሢ ኮሺ ናንጊ ናንጋንዳጉዲ ካኖ ቦያንታ ጫሪንጫ ባራና ካፖንታ ካኖ ቦያ ዳኮንታ ዴኤፖንታ ዎላ ታኣኒ ሳሌ ሳላዳንዳኔ፤

ዒንሢ ናንጋ ሳይደገፍ ያልዚ ዓንጋሞና ያልቶ ያልዚያኦ ታኣኒ ባይዘንዳኔ።

19 ዒሰራዔኤሌ! ናንገና ታ ማቾ ማሂ ታ ኔና ናንገሻንዳኔ፤
ዒሎ ማዶ ማዲሢና ፒዜ ዋጌ ዋጊሢና
ናንገና ናንጋ ናሹሞና ናሽኪ ሚጨንቲ
ዓዳ ታ ማቾ ማሂ ታ ኔና ዘጋንዳኔ።

20 ታ ማቾ ማሂ ታኣኒ ኔኤና ዋላ ሳላዴ ሳሎ ካፓንዳኔ፤
ታኣኒ፥ ናንገና ናንጋ ጎዳ ማዔሢ ኔኤኒያ ዔራንዳኔ።

21 ናንገና ናንጋ ጎዳ ሂዚ ጋዓንዳኔ፡-
«ዬኖ ከሎና ታኣኒ ማሂ ከኤዛ ባኮ ከኤዛንዳኔ፤
ታኣኒ ጨሪንጮም ማሂ ከኤዛንዳኔ፤
ጨሪንጮኦ ሳዖም ማሂ ከኤዛንዳ ባኣዚ ዓኣኔ።

22 ሳባ ሃኣኮንታ ዋይኔንታ ሪሚቲ ዛይቲንታ ጴዲሳያ ማዒ
ዒይዚራዔኤሌም ማሂ ከኤዛንዳኔ።

23 ታኣኮ ዴር ታኣኒ ሳዔሎይዳ ማዢ ዶዲሺ ዔቁሳንዳኔ፤
ዔያታ ዖርሳጨ ናንጋንዳጉዲያኦ ታኣኒ ማሃንዳኔ፤
ሳማ ዓቶም ጌይ ቲኢሪንታዓኬ» ጌይንቲ ዴር ሚጨንቲ ታኣኒ
ቲኢራንዳኔ፤
«ዒንሢ ታ ዴሬቱዋሴ» ጌይንቲ ዴር ታ ዴሬኬ» ታኣኒ ጋዓንዳኔ፤
ዔያታ ዒማና «ኔኤኒ ኦኡኮ ያኦዛሢኬ» ጋዓንዳኔ።»

3

ሆሴዔና ዒዛኮ ዘኣዛ ኮኦማ ላኣሌሎና

1 ናንገና ናንጋ ጎዳ ታኣም፡- «ዒሰራዔኤሌ ዓሳ ሜሌ ያኦዞ ባንሢ
ሺሪ ዬያቶ ያኦዞም ዴማሲ ዒንጎ ዋይኖ ዓኣፖ ሜሌሢ ናሽካያ
ማዔቲያ ናንገና ናንጋ ጎዳ ዔያቶ ናሽኬሢጉዲ ኔኤኒያ ኔኤኮ ዘኣዛ
ኮኦማ ላኣሌሎ ናሽኪ ዒዛና ዋላ ናንጌ» ጌዔኔ።

2 ዬያር ታኣኒ ዒዛ ታጰ ዶንጎ ሹቺ ቢራና ፃኤታና ዶንጊታሚ ከሎ
ማዓ ዔልዓና ጊንሣ ሻንቂ ዔኬኔ፤

3 ታኣኒ ዒዛም፡- «ሜሌ ዓሲና ዘኦሰካ ኮኦሚ፥ ሜሌ ዓሲያኦ
ናሽኩዋዖ ታኣና ዋላ ሚርጌ ዋዴ ናንጌ፤ ታኣኒያ ኔኤና ዋላ
ናንጋንዳኔ» ጌዔኔ።

4 ዬያ ጎይዖ ዒሰራዔኤሌ ዴራ ካኣቲያ ሱኡጌያ ባኣያ፥ ያኦሲም
ዒንጎ ባኣዚያ ባኣያ ዳኣቦዋ ዳኣቦዋ፥ ዔፑዴያ ባኣያ፤ ጊንሣ ሃሣ
ካኣሽኮ ያኦዛ ባኣያ ማዒ ሚርጌ ዋዴ ናንጋንዳኔ፤

5 ዩካፓ ዒሰራዔኤሌ ዓሳ ናንጊና ናንጋ ጎዳ ማዔ ዔያቶኮ ጾክዛሢና ዔያቶኮ ካኣቲ ዳውቴና ባንሢ ሺራንዳኔ፤ ጋፒንፆ ዋዶይዳ ዒጊጪ ጎጋይቂሢና ናንጊና ናንጋ ጎዳ ባንሢ ዔያታ ዩዓንዳኔ፤ ዓንጂንታ ዓንጆዋ ዔያታ ዔካንዳኔ።

4

ጾሱ ዒሰራዔኤሌ ዓሶ ማኪ ጌሰቲ ጌኤዞ

1 ሃኖ ሳዔሎይዳ ናንጋ ዓሶ ቢያ ናንጊና ናንጋ ጎዳ ማኪ ጌሰታ ጌኤሲ ዓኣኔ፤ ዩያሮ ዒሰራዔኤሌ ዳሬዮቲ! ዒዚ ዒንሢሞ ጋዓ ባኮ ዋይዙዋቲ፡- «ሃኖ ሳዖይዳፓ ጉሙርቂንቲሢንታ ናሹሞንታ ጾሱ ዔሪሢያ ጋፒ ባይቂኔ።

2 ዔያታ ዋሊም ሉሉቃኔ፥ ጋጋዳንቃኔ፥ ዓሲ ዋዋዳኔ፥ ዉዉኡቃኔ፥ ማቾ ሃሣ ዓኒ ማዒባኣያና ላሃኔ፥ ዋሊ ዋዲሢያ ሚርጊ ሚርጊ ዴንዴኔ።

3 ዩያ ዛሎና ሳዓ ዓቢ ማዔም ዔኤቢያ ሜሊ ጋፓኔ፤ ሳዔሎይዳ ናንጋ ባካኣ ቢያ ዋልቂ ባይቂ ላባኔ፤ ቆልማ፥ ካዮ ቦዓ፥ ካፖንታ ባዘይዳ ናንጋ ሞላሢንታ ቢያ ሃይቂ ጋፓኔ።»

ጾሱ ቄኤሶ ማኪ ጌሰቲ ጌኤሲ

4 ናንጊና ናንጋ ጎዳ ሂዚ ጋዓኔ፡- «ታኣኒ ማኪ ጌሰታሢ ዒንሢ፥ ቄኤሶም ማዔሢሮ ዴራ ዔኤቢ ዳቤኔ ጌይ ጌሰታ ዓሲንታ ዴሮ ማኪ ጌሰታ ዓሲ ባኣያ ማዖም።

5 ዒንሢ፥ ቄኤሳ! ርኦሮ ፖዖይዳ ሃንታዖ ዲቂንታኔ፤ ታ ማሊዖ ኬኤዛ ዓሳኣ ዒንሢና ዋላ ዲሞይዳ ሃንታኔ ጌይ ዲቂንታኔ፤ ዩያሮ ታኣኒ ዒንሢኮ ዒንዶ ማዔ ዓጩሎ ባይዛንዳኔ።

6 ታኣኮ ዴራ ታና ኮይሳ ጎይዖጉዴያ ዔሪባኣሢሮ ባይቂኔ፤ ዒንሢያ ታና ዔራኒ ኮይባኣሢሮ ዒንሢ ቄኤሴ ማዒ ታኣም ማዳንዳጉዲ ታ ኮዑዋሴ፤ ታና፥ ዒንሢኮ ጾክዛሢ ዋጎ ዒንሢ ቶኦቼሢሮና ዋሊ ዒንሢ ሃሹሢሮ ናኣቶ ታ ዒንሢኮ ያዲ ዋሊ ሃሻንዳኔ።

7 «ዒንሢ፥ ቄኤሳ! ፓይዳ ዒንሢኮ ዲቢ ዴንዴ ጎይዖጉዴያ ታኣም ዒንሢ ዓይሢንቶ ዒፂ ዳቤ ዳቢንታኣ ዒንሢኮ ያዲ ሚርጊ ዴንዴኔ፤ ታኣኒያ ዒንሢኮ ቦንቾ ባይዚ ዒንሢ ዳውሲሳንዳኔ።

8 ታ ዴሮኮ ጎማ ዒንሢሞ ዖርጎጪሢኮ ካራ ማዔሢሮ ዴራ ዲቢ ጎማ ማማዳንዳጉዲ ዒንሢ ኮዓኔ።

9 ዒንሢ፥ ቄኤሳኣ ዴሮጉዲ ማዔኔ፤ ዩያሮ ዴሮይዳ ታኣኒ ዒጋንዳ ፑርቶ ባካ ዒንሢ ቄኤሶዋ ሂላንዳኔ፤ ፔቲ ፔቲ ዓሳ ሃንቲ ጎይዖጉዴያ ኮሞ ታኣኒ ኮፃንዳኔ፥ ማዴ ማዶማ ጉዴያ ሃሣ ማሂታኣኒ ዒንጋንዳኔ።

10 ዔያታ ታና ሃሼሢሮ ሙዓኔ፥ ጋዓንቴ ሚሽኩዋሴ፤ ሜሌ ያኦዞም ዚጎ ቤዘይዳ ዘኦዞ ኮኦማኔ፥ ጋዓንቴ ናይ ዔያታ ሾዑዋሴ።»

ሜሌ ያኦዞ ካኣሽኪሢ ዛላ ያኦሲ ጌሰቴ ጌኤሲ

11 ናንጊና ናንጋ ጎዳ ሂዚ ጋዓኔ፡- «ዘኦሰካ ኮኦሚሢንታ ካፄ ዎይኖ ዑዞንታ ሙርጎንታ ታ ዳሮኮ ዒኖ ባይዘኔ።

12 ዬያሮ ሚሢና ኮሽንቴ ሜሌ ያኦዞ ኮይላ ዞሮ ዔያታ ያኦጫኔ፤ ዬይ ሚፃ ዔያቶም ማሂ ዔኤቢ ኬኤዛንዳያ ማላኔ፤ ዘኦሰካ ኮኦማንዳጉዲ ማሃ ዓያና ዔኪ ታና ዔያቶኮ ያኦዞሢ ሃኪ ዔያታ ዴንዴኔ።

13 ዱኮና ጌሚሮናይዳ ቢያ ሜሌ ያኦዞም ዒንጎ ባኣዚያ ዒንጊ፥ ዑንጂያ ዔያታ ጨቢሻኔ፤ ዬያ ዔያታ ማዳሢ ዴኤፖ ሚፆ፥ ካኣፓ ጋምፒንቴ ዴንዳ፥ ሸባኣ ኮሽ ጊኢጋያ ማዔ ሻኣቦንታ ዴማ ዴማ ሚፆ ዴማኮ፤ ዬያ ዒንሢ ማዳሢሮ ዒንሢኮ ዉዱሮ ናኣቶንታ ናኣዚንሢ ላኣሎንታ ናይ ሾዓኒ ዘኦሰካ ኮኦማያ ማዓንዳኔ።

14 ዒንሢኮ ዉዱሮ ናኣቶንታ ናኣዚንሢ ላኣሎንታ ናይ ሾዓኒ ኮይያና ዘኦሰካ ኮኦማ ዎይና ታኣኒ ሚቶና ጎሪ ዔያቶ ማሃዓኬ፤ ዓይጎሮ ጌዔቴ ዒንሢ፥ ዓቲንቃ ጌኤዢ ማኣሮይዳ ዓንሢ ማዒባኣ ዓሶና ላሃ ላኣሎ ጊንፆ ሃንቲ ሃንቲ ሜሌ ያኦዞ ዒንሢ ካኣሽካኔ፤ ዬያሮ ማሊ ጳቂሡዋ ዴሬ ባይሲንታይዳ ኬዳንዳኔ።

15 «ዒሰራዔኤሌ ዴሬዮቴ! ዒንሢ ዘኦሰካ ኮኦማ ዓሲ ማዔቴያ ዪሁዳ ዴሮ ዳቢንቲዳ ጌልዚፖቴ፤ ጌልጌላኣ ማፆም ቤትዓዌ * ዴንዲፖቴ፤ ናንጊና ባይቁዋናንጋ ያኦሲ ሃይቆ!፤ ጌይ ጫኣቂፖቴ።

16 ዒሰራዔኤሌ ዴሬ ዔኤቢ ዓቲኔ ጎዑዋ ማሮጉዲ ዋይዚ ዒፄኔ፤ ሂዳና ናንጊና ናንጋ ጎዳ ዔያቶ ማራናይጉዲ ዎይቲ ኮሽ ቤሰካ ሄንቃኒ ዳንዳዓይ?

17 ዔፒሬኤሚ ዴራ ሜሌ ካኣሽ ካኣሽኪሢና ሜሌ ያኦዞና ዎላ ቱኡቴያ ማዔሢሮ ሼኔ ጌዔ ባኣዚ ማዶንጎ ዔያቶ ሃሹዋቴ።

18 ዎይኖ ዑዞ ሚርጊሽ ዔያታ ዑሽካፆ ዘኦዞ ኮኦማያ ማዶ ዓርቃኔ፤ ዔያቶኮ ሱኡጋ ቦርሲሳ ማዶ ማዳሢ ዒናፓ ናሽካኔ።

19 ዔያታ ዓልጎ ዠባሬና ፒፂንቴ ዴንዳ ባኣዚጉዲ ዔውቲ ዴንዲ ባይቃንዳኔ፤ ሜሌ ያኦዞም ዒንጎ ባኮ ዒንጊያናኣ ዔያታ ዳውሲንታንዳኔ።»

* 4:15 ቤትዓዌ፡- ጌይፃ «ፑርቱዋኮ ማኣሪ» ጌይሢኬ፤ ዬና ቤኤቴሌሚም ጌሢንቴ ጫቺ ሱንሢኬ።

5

ዒሰራዔኤሌይዳ ዓገንታኒ ገሊጌ ሜቶ

1 «ዒንሢ ቄኤሳ! ዋይዘዋቱ!

ዒንሢ ዒሰራዔኤሌ ዓሳ ኮሺ ዒና ዔኪ ማሉዋቱ!

ዒንሢ ካኣቶ ማኣሮ ዓሳ ሃያ ኮሺ ዋይዘዋቱ!

ዒንሢዳ ሜታ ዓገንታኒ ገሊጌኔ፤

ሚፂጳይዳ ዓሶኮ ዒንሢ ሆሌ ፒሮ

ታኣቦኦሬይዳ ቶኪ ፒሮ ማዔኔ።

2 ዋይዘ ዒፃ ፑሮቶ ዓሳ ዓሲ ዎዲሢሮ ኬሰኬ ዓሲ ማዔኔ፤

ዬያሮ ቢያሢዳ ታኣኒ ሜቶ ዓገንዳኔ።»

3 «ዔፕሬኤሜ ዛሎ ቢያ ጋፒ ታኣኒ ዔራኔ፤

ዒሰራዔኤሌ ባካኣ ታ ቤርታ ዓኣሺንቱያቱዋሴ።

ዔፕሬኤሜ፥ ኔኤኒ ዘኦሰካ ኮኣማያ ማዔኔ፤

ዒሰራዔኤሌያ ዒኢቱኔ።»

4 ዘኦሰካ ኮኣማንዳጉዲ ማሃ ዓያና ዒሰራዔኤሌ ዴሮ ዒኖይዳ ዓኣሢሮ፥ ናንገና ናንጋ ጎዳኣ ዔያታ ዔራዋኣሢሮ ያኦሲ ባንሢ ዔያታ ማዑዋጉዲ ዔያታ ማዳ ማዳ ዔያቶ ላኣጌኔ።

5 ዒሰራዔኤሌ ዴሮኮ ያቶርማ ዔያቶም ፔኤሮ ማርካዳኔ፤ ጎማ ዔያቶኮ ፒሮ ማዒ ዔያቶ ቡኡዲ ሎንሣኔ፤ ዪሁዳ ዴራኣ ዔያቶና ዋላ ዲቂንቲ ሎኣማኔ።

6 ዒንጎ ባኣዚ ማሂ ያኦሲም ሺኢሻኒ ማራቶንታ ባኣቶንታ ዒሺ ዔኪ ዒዛ ኮይታ ዔያታ ዴንዳኔ፤ ጋዓንቲ ዒዚ ዔያቶ ቤርታፓ ዴማዲ ዶጪ ዔቂሢሮ ዔያታ ዒዛ ዴንቂንዲዋሴ።

7 ዔያታ ሜሌ ያኦዘ ካኣሽካያ ማዔሢሮ ናንገና ናንጋ ጎዳም ጉሙርቂንታያ ማዒ ጴዲባኣሴ። ናኣታ ዔያቶኮ ሜሌ ያኦዘሮ ማዔኔ፤ ዬያሮ ሃኖ ዓገኖ ጄኤሮና ዔያቶንታ ዔያቶኮ ሳያንታ ቢያ ባይቃንዳኔ።

ዪሁዳና ዒሰራዔኤሌና ባኣካ ኬሰካንዳ ያልዚ

8 ያልዚም ኬሰካንዳጉዲ ጌባያኦኔይዳ ዛዬ፥ ራኣማይዳ ፖሮዚ ዋርቁዋቱ! ቤትዓዌኔይዳ ዔቂጋፓ፡- «ቢኢኒያሜ ፃጲዮ! ኑኡኒ ኔኤና ዋላኬ» ጌይ ጌይ ዒላቱዋቱ።

9 ታኣኒ ሜቶ ዓጋ ኬሎና ዔፕሬኤሜ ሻሂንቲ ዶዔ ካታማ ማዓንዳኔ፤ ዬይ ጎጌና ዒሰራዔኤሌ ፃጲ ሄላንዳጉዲ ታኣኒ ዓጌ ባይሲንታኬ።

10 ናንጊና ናንጋ ጎዳ ሂዚ ጋዓኔ፡- «ዪሁዳ ዓጮ ሱኡጋ ጌዲ ዋዲ ጎሽካ ዓሲጉዲ ማዕሢሮ ታኣኮ ዳጎ ዲጲጉዲ ዔያቶ ዑፃ ማሂ ታኣኒ ዳካንዳኔ።

11 ዔፕሬኤሜ ሜሌ ፆኦዞ ካኣሽኪሢ ናሽኬሢሮ ሄርቂ ዋይሥሢና ፒዜ ዋጌ ባይቂሢና ዔያቶ ሄሌኔ።

12 ዬያሮ ታኣኒ ዔፕሬኤሜም ቢሎ፥ ዪሁዳ ዴሮም ሃሣ ኮሴ ማዕኔ።

13 «ዔፕሬኤሜ ሃርጊንቲፆ፥ ዪሁዳኣ ሜቂ ኪፃፎ ኪፆ ዴንቄኔ፤ ዩካፓ ዔፕሬኤሜ ዓሶኦሬ ዓጮ ዴንዴኔ፤ ማኣዶ ፆኦጪኒያ ዴኤፖ ካኣታሢ ኮይላ ኪኢታ ዓሲ ዳኬኔ፤ ጋዓንቲ ዬይ ዔያቶ ዓውሳኒነታ ኪፆ ዔያቶኮ ፓሢኒ ዳንዳዒባኣሴ።

14 ዬያሮ ታኣኒ ዘቢጉዲ ዔፕሬኤሜ፥ ጊንሣ ሃሣ ሃጊ ዔቃ ዘቢጉዲ ዪሁዳ ሜንሢ ጋኣጪ ዴንዳንዳኔ፤ ዓርቂ ዔኪያኣ ታኣኒ ዴንዳንዳኔ፤ ዔያቶ ዓይጌያ ዬያይዳፓ ዓውሳዓኬ።

15 «ሜታ ዔያቶ ሄላዛ ታና ዔያታ ኮዓንዳኔ፤ ዬያሮ ዔያታ ዳቤ ዳቢንቶ ዔሬታ ባንሢ ማዓንዳያ ሄላንዳኣና ዔያቶፓ ታኣኒ ሃኪ ዶጪ ዔቃንዳኔ።»

6

ዒሰራዔኤሌ ዴሮኮ ጎሞ ቡኡፃያ ማሊ ጌሺፆ

1 ዴራ ሂዚ ጋዓኔ፡- «ሃኒ ዬውዋቲ! ናንጊና ናንጋ ጎዳ ባንሢ ኦ ማፆም! ዒዚ ኦና ሜንሢኔ፥ ዒ ኦና ኮኦሊ ዓውሳንዳኔ፤ ዒዚ ኦና ኪፃሴኔ፥ ዒ ፔኤሮ ፓዒሳንዳኔ።

2 ዒዛ ቤርታ ሽምፔና ኦ ናንጋንዳጉዲ ላምፆ ኬሊኮ ጊንፃ ዒ ኦና ዓካሳንዳኔ፥ ሃይሣሳ ኬሎና ሃሣ ዒዚ ኦና ሽምፔና ዓኣያ ማሂ ዔቂሳንዳኔ።

3 ሃኒ ዬውዋቲ፥ ናንጊና ናንጋ ጎዳሢ ኦኡኒ ዔሮም፤ ሴካ ሃንጋ ጎዑዋፆ ዒዛ ጊንፆ ኦ ሃንቶም፤ ዒዚ ፆፆርቃ ዓቢጉዲ፥ ሃሣ ጊንሣ ሳፆ ዑሺ ሚሻ ባርጊ ዒርዘጉዲ ኦ ባንሢ ዬዓኔ።»

4 ናንጊና ናንጋ ጎዳ ሂዚ ጋዓኔ፡- «ዔፕሬኤሜና ዪሁዳና ዴሬዮቲ! ታ ዒንሢ ዋዋዳንዳይ? ዒንሢ ታና ናሽካ ናሹማ ጉቲና ጴዳ ሊኢሎና ፆልከናጉዲ ኔጉዋፆ ባባይቃኬ።

5 ዬያሮ ታ ማሊፆ ኬኤዛ ዓሶና ታኣኒ ዒንሢ ቲቄኔ፤ ታ ዳንጋፓ ኬሰካ ቃኣሎና ታ ዒንሢ ዋዴኔ፤ ታኣኒ ዒንሢዳ ዓጌ ፑርቶ ባካ ዜኤሊንሢጉዲ ዒንሢዳ ፖዔኔ።

6 ታኣኒ ታአም ዒንጎ ባኣዚፓ ባሼ ዱማ ዱማ ካራና ላኣሚንቱዋ ናሹዋ ኮዓኔ፤ ሚቺ ዒንጎ ባኮይዳፓኣ ባሼ ታና፥ ናንጊና ናንጋ ጎዳ ዒንሢ ዒራንዳጉዲ ታኣኒ ኮዓኔ።»

7 «ዓሲ ታኣና ዋላ ጫኣቄ ጫኣቄዋ ሃሼሢጉዲ ዒያታ ታኣኒ ዒያቶም ዒንጌ ዓጩሎ ጌላፃ ጫኣቄ ጫኣቄዋ ኬኤሪ ሃሼኔ፤ ታአም ጉሙርቂንቱዋያ ማዒያዋ ፔጋሲ ዒያታ ዳዌኔ።

8 ጌሌዓዴ ካታማ ፑርታ ዓሲና ዓሲ ዋዴ ዓሲያኣ ኩሜ ካታማ ማዒኔ።

9 ሱላ ዓሲ ዋዴኒ ካታያጉዲ ቄኤሳ ዋላ ማርቲ ዒማይዳያ ማዒኔ፤ ሴኬኤሜ ዒኪ ዴንዳ ጎይያይዳታፃ ካቲ ካቲ ዓሲ ዒያታ ዋዴኔ፥ ቦርሲሳያ ማዒ ጌኔ ማዶዋ ማዴኔ።

10 ዑስካ ጌላ ባኣዚ ዒሰራዒኤሌ ዴራ ማዴያ ታኣኒ ዴንቄኔ፤ ዒፕሬኤሜ ዘኣስካ ኮኣማያ ማዒኔ፤ ዒሰራዒኤሌያ ዒኢቴኔ።»

11 «ዒንሢ፥ ዪሁዳ ዴሬዮቴ!
ታኣኒ ዒንሢዳ ዋጌ ዋጎንዶ ኬሊ ሜንሣኔ።»

7

1 «ታ ዴሮ ዒሰራዒኤሌ ታኣኒ ፓሣኒ ኮዓዛ ዒፕሬኤሜኮ ጎማ፥ ሳማሪያኮ ፑርቱማ ፔጋዲ ታአም ጴዴኔ፤ ዒያታ ዋሊም ሉሉኦቃኔ፥ ማኣሪ ሜንሢ ጌሊ ዉዉኦቃኔ፥ ዋላ ማርቲ ፔቱሞና ጉርዶ ዴንዲ ዴንዲ ዓሶ ቡራኔ።

2 ጋዓንቲ ታኣኒ ዬያ ቢያ ፑርቱሞ ዒያቶኮ ዒሬያታሢ ዒያታ ጸቂሡዋሴ፤ ዬያፓ ዒቄያና ዒያቶኮ ጎማ ዒያቶ ዴኡኬኔ፤ ዒያታ ማዴ ፑርቶ ማዴ ቢያ ታ ዓኣፓፓ ዓኣሺንቲያቱዋሴ።»

ካኣቱሞ ማኣሮይዳ ማዴንቲ ጌኔ ማዶ

3 ናንጊና ናንጋ ጎዳ ሂዚ ጋዓኔ፡- «ዒያታ ዒያቶኮ ፑርቱሞና ካኣቲ ዋዛሲ፥ ሱኡጎ ማዒ ዋይሣ ዓሶዋ ፔ ሉኡዙሞና ዋዛሳኔ።

4 ዒያታ ቢያሢ ዘኣስካ ኮኣማያኬ፤ ካፃንዳጉዲ ዴንቂ ሃሾና ዴኢላ ካዲ ጋኣባንዳያ ሄላንዳኣና ላኣዶ ላኣዳ ዓሴላ ታሞ ዴማ ዳካኒ ኮይሱዋ ቦኦቆጉዲ ዒያታ ፃይዲ ቴኤሊ ዓኣያኬ።

5 ካኣቲኮ ቦንቾ ኬሎና ሱኡጋ ዋይኖ ዑዢ ሚርጊሺ ዑሽኪ ማሢንቲ ሃርጌኔ፤ ዒዚያ ዬያ ፓሡዋ ዓሶና ዋላ ፔቲ ማዒኔ።

6 ጌጌ ማዶ ማዶንዶ ካራ ማዠኒ ዒና ዔያቶኮ ናኣቦ ታሚጉዲ ያይዲያኬ፤ ጌሮ ማዶ ዔያቶኮ ዒባኖ ቢያ ጨቤ ጎይሣ ዋርቃኔ፤ ሳባ ካራዛ ጋባንቴ ታሚጉዲ ዔዔኤታኔ።

7 «ዔያታ ቢያሢ ፔ ጌሮ ማዶና ናኣቦ ታሚጉዲ ያይዲ ፔኤኮ ሱኡጎ ሙዔኔ፤ ዔያቶኮ ካኣቶዋ ፔ ዋዶና ዋዶና ዋዲ ዔያታ ባይዘኔ፤ ዬይ ቢያ ያዲ ማዓኣና ዬያቶ ካኣቶ ባኣካፓ ፔቴታዎ ታኣኒ ማኣዳንዳጉዲ ታና ያኦጨይ ባኣሴ።»

ዒሰራዔኤሌ ዴራ ሜሌ ዴሮና ዋላ ሲኢሪንቴሢ

8 ናንጊና ናንጋ ጎዳ ሂዚ ጋባኔ፡- «ዔፕሬኤሜ ሜሌ ዴሮና ዋላ ሲኢሪንቴኔ፤ ዬያሮ ዔያታ ዛኣሩዋዎ ቦኣቆይዳ ሃሾና ላኣዳጉዲ ፑርቴ ጉሪ ዓቴኔ፤

9 ፃንጎ ማዔ ዴራ ዋልቆ ዔያቶኮ ጉሪ ሙዔኔ፤ ዔያታ ጋባንቴ ዬያ ማሊ ዒና ዔኪባኣሴ፤ ሜሌ ዓሳ ዔያቶ ዋይሣንቴና ቶኦካ ዔያቶኮ ቡኡቄኔ፤ ጋባንቴ ዬያኣ ዔያታ ዒና ዔኪባኣሴ።

10 ዒሰራዔኤሌ ዴራ ያቶርቄ ያቶርማ ሺሪ ዔያቶ ዑፃ ማርካዴኔ፤ ዬይ ቢያ ያዲ ማዔቴያ ታና፡ ናንጊና ናንጋ ጎዳ ማዔ ዔያቶኮ ያኦዛሢ ባንሢ ዔያታ ማዒባኣሴ፤ ማዒኒያ ፔቴታዎ ዔያታ ኮይባኣሴ።

11 ዔፕሬኤሜ ዶኦሌጉዲ ጉሪ ሹሌዔ፡ ጊንሣ ሃሣ ዒኔያኣ ባኣያ ማዔኔ፤ ዬያሮ ፔና ማኣዳንዳሲኦዋይ ጌይ ፔቴና ጊብፄ ባንሢ ዒላታኔ፡ ባጌናና ጊንሣ ዓሶኦሬ ባንሢ ጳሽካኔ።

12 ዬያ ዔያታ ሃንቴ ሺራ ቤዞ ቢያይዳ ታኣኮ ፒራሢ ፒሪ ካፒጉዲ ታኣኒ ዔያቶ ዓርቃንዳኔ፤ ዔያታ ማዶ ፑርቶ ማዶ ዛሎ ታ ዔያቶይዳ ሜቶ ዓጋንዳኔ።

13 «ታና ሃሺ ሃኪ ዔያታ ዴንዴሢሮ ዔያቶ ባዴዔ! ታኣሞ ዔያታ ዋይዞ ዒፄሢሮ ባይሲንታ ዔያቶይዳ ሙኮሞ፤ ታኣኒ ዔያቶ ዓውሳኒ ኮዔያታንቴ ዔያታ ታኣሞ ሉኡቃያ ማዔኔ።

14 ዔያታ ፔኤኮ ዓርሶይዳ ላሂ ዒላታኣፓዓቴሞ ዒናፓ ታና ሸኢቁዋሴ፤ ሃኣኮንታ ዋይኖ ዑዠንታ ዴንቃኒ ፔኤኮ ዑዎ ዔያታ ቴቂ ኪፃሳኔ፤ ታኣሞ ዔያታ ዋይዚያ ዋይዙዋሴ።

15 ዔያቶ ዔርዘሢንታ ዋልቆዋ ዔያቶኮ ዶዲሹሢ ታናኬ፤ ዔያታ ጋባንቴ ታኣሞ ጌጌ ማዶ ማዳኒ ዋላ ቡኪ ዔቃኔ፤

16 ታና ሃሺ ሜሌ ፓሡዋ ካኣሺዳ ዔያታ ጌሌኔ፤ ዱኮና ቤዞ ሃሺ፡ ሹኤሊ ዴንዴ ዓኣዛ ዔያታ ማዔኔ፤ ዔያቶኮ ሱኡጋ ፑርታ ባኣዚ ጌሰቴሢሮ ያልዚዳ ሃይቃንዳኔ፤ ጊብፄ ዓሶኮ ሚኢቺ ዔያታ ማዒንዳኔ።»

8

ዒሰራዔኤሌ ዴሮኮ ሜሌ ፆኦዞ ካሽኪፆ ዳቢንቲ ማዒፆ

1 ናንጊና ናንጋ ጎዳ ሂዚ ጋዓኔ፦ «ታኣና ዋላ ጫኣቄ ጫኣቄዋ ታ ዴራ ሃሽሢሮና ታኣኮ ዋጎዋ ካፖ ዒፃሢሮ ሞርኬ ታ ማኣሮይዳ ሃምፑሮጉዲ ሺራያታሢሮ ፆልዚሮ ጊኣጉዋቲ ጋዓ ዛዮ ዋርቁዋቲ!»

2 ዒሰራዔኤሌ፦ «ፆኦሲዮ! ኮኡኒ፥ ኔኤኮ ዴራ ኔና ዔራኔ» ጌይ ጌይ ታ ባንሢ ዒላታኔ፤

3 ጋዓንቲ ዒሰራዔኤሌ ዴራ ኮሺ ባኣዚ ዒፃሢሮ ሞርካ ዔያቶ ዳውሳንዳኔ።

4 «ታኣኒ ዔሪባኣንቲ ካኣቶ ዔያታ ካኣታሢኔ፤ ታና ፆኦጪባኣፆ ሱኡጎ ዔያታ ዶኦሬኔ፤ ዔያታ ፔኤኮ ቢሮና ዋርቆ ዓንጎና ሜሌ ፆኦሲ ኮሺ ፔኤም ዔቲ ቦኣኬኔ።

5 ሳማሪያ ዴሬዮቲ! ናኣሮ ማሊሲ ማዦና ሜሌ ፆኦዞ ታ ዒንሢኮ ሻኣኪንቲኔ፤ ታኣኮ ዳጋ ዒንሢዳ ታሚጉዲ ዔኤታንዳኔ፤ ዒንሢ ዳቢንቲፓ ሃኪ ፃሎ ማዕዋኣሢ ዓይዲ ሄላንዳኣናዳይ?

6 ሃይ፥ ናኣሪ ማሊሲ ኮሾና ሜሌ ፆኦዞ ዓሲ ፔ ኮቺና ማዦ ባኣዚታሢሮ ፆኦሲ ማዓኒ ዳንዳዑዋሴ፤ ዬያሮ ናኣሪ ማሊሲ ኮሾና ሳማሪያ ፆኦዞ ሜቂ ሁርዳንዳኔ።

7 ዔያታ ዠባሬ ዜርቂ ዓልጎ ጮኦራ ዓሲ ማዓንዳኔ፤ ሃውላ ጉሪ ዔቂያኬ፥ ዓኣፔ ባኣዚ ጊዳ ባኣያኬ፤ ዓኣፔ ባኣዚ ዓኣያ ማዔቲያ ሜሌ ፆንጎ ዓሲ ሙኪ ሙዓንዳኔ።

8 ዒሰራዔኤሌ ዴራ ሜሌ ዴሮ ባኣካ ዔኤዲንቲ ባይቄኔ፤ ፓሣ ባኣዚ ባኣ ሜሄ ማዒ ጉሪ ዓቲኔ።

9 ፔኤሮ ዣኣሊ ሃንታ ኪርሞሌጉዲ ዓሶኦሪ ባንሢ ዔያታ ዴንዳኔ፤ ዔያቶ ዓውሳንዳጉዲ ዔኤቢ ጪጊ ሜሌ ካኣቶ ዔያታ ሺኣቄኔ፤

10 ሜሌ ካኣቶ ሺኣጲፆ ዔያታ ዔኤቢ ጪጌያ ማዔቲያ ታኣኒ ዔያቶ ፔቲይዳ ቡኩሳንዳኔ፤ ካኣቶንታ ሱኡጎንታ ሄርቂ ዔያቶ ዋይሣ ዋይሢያና ዋልቂ ባይቂ ዳኪ ዳኪ ዔያታ ዴንዳንዳኔ።

11 «ዔፕሬኤሜ ፔኤኮ ጎሞ ጌኤሻኒ ታኣም ዒንጎ ባኣዚ ዒንጎንዶ ቤሲ ሚርጌ ኮሼኔ፤ ጋዓንቲ ዬያታ ዒንጎ ባኮ ዒንጎ ቤዛ ጎሜ ማዶ ቤሲ ማዒኔ።

12 ታኣኒ ዔያቶም ታ ዋጎይዳፓ ሚርጌ ዳምቤ ፆኣፒ ዒንጌኔ፤ ዔያታ ጋዓንቲ ዓኪ ቢሪ ባኣዚ ማሂ ዛጌኔ።

13 ታኣም ዔያታ ዒንጋኒ ቃራ ቃራ ባኣዚ ዔኪ ሺኣሺቲያ፥ ዬያ ዒንጊንቲ ባኮኮ ዓሽኮ ዔያታ ሙዔቲያ ታኣኒ፥ ናንጊና ናንጋ ጎዳ ዬያ ዔያቶኮ ዔካያቲዋሴ። ታኣኒ ዔያቶኮ ዳቢንቶ ዛጊ ዔያታ ማዳ ጎሞሮ

ሜቶ ታ ዔያቶይዳ ዓጋንዳኔ፤ ጊብፄ ዓጮይዳ ዔያታ ዓይሌ ማዒ ናንጌ ጎይፆ ማዓንዳኔ።

14 «ዒሰራዔኤሌ ዴራ ፔኤም ዴኤፒ ዴኤፒ ካኣቱሞ ማኣሪ ማገፍኔ፤ ታና ማገፍ ፆኣዛሢ ጋዓንቴ ዔያታ ዋሌኔ፤ ዪሁዳ ዴራኣ ሚርጌ ዙሎ ኬልቂ ኮሾና ካታማ ማገፍኔ፤ ዬያሮ ዬያ ዔያቶኮ ካታሞንታ ካታሞኮ ዙላ ዓኣ ኬኤሎ ዲፆንታ ሙዓንዳ ታሚ ታኣኒ ዒኢካ ኬይሳንዳኔ።»

9

ዒሰራዔኤሌ ዓሶይዳ ሜታ ዬዓንዳሢ ሆሴዔ ኬኤዘሢ

1 ዒሰራዔኤሌ ዴሬዮቴ! ሃኣኮ ሺርኮ ቆይዶይዳ ቆይዶይዳ ዓኒንሢ ማዒባኣ ዓሶና ዓኒንሢ ኮኣሚሢ ዛሎ ዓኒንሢሞ ዒንጊንታ ባካ ባዓኣሌ ጌይንታ ፆኣዛሢ ዓኒንሢሞ ዓኒንጋያ ማሌም ዓኒንሢ ዋዛዳኔ፤ ዬያ ማዲፆና ዓኒንሢ ፆኣዛሢሞ ዓኒንሢ ጉሙርቂንታያ ማዒባኣሴ፤ ዬያሮ ሜሌ ዴሮጉዲ ዋዛዳ፡ ሃሃ ኮኣሚ ሺሪፆ ሃሹዋቴ!

2 ሃይካፓ ሴካ ዓኒንሢ ሃኣኮ ሺርኮ ቆይዶይዳ ዓኒንሢሞ ጊዳንዳ ሃኣኮ፡ ዋይኖ ጩኡጳ ቤዘይዳኣ ጊዳንዳ ዋይኔ ዑሺ ዴንቃዓኬ፤ ካዲባኣ ሙርኅ ዋይኖ ዑዣኣ ዓኒንሢሞ ፓጫንዳኔ።

3 ናንጊና ናንጋ ጎዳ ዔያቶም ዓኒንጌ ሳይይዳ ዔፕሬኤሚ ናንጊንዱዋሴ፤ ጋዓንቴ ናሽኪባኣፆ ጊብፄ ዓጮ ዔያታ ማዒ ዴንዳንዳኔ፤ ዓሶኦሬ ዓጮዋ ዔያታ ዴንዲ ዳምቦ ጎይፆና ጌኤሺ ማዒባኣ ካሦ ሙዓንዳኔ።

4 ዒኢካ ዔያታ ናንጊና ናንጋ ጎዳም ዋይኖ ዑዣ ዓኒንጎ ባኣዚ ማሂ ዓኒንጊ ዴንዳዑዋሴ፤ ዔያታ ዓኒንጋ ባኣኣ ናንጊና ናንጋ ጎዳ ዋዛሳያ ማዒንዱዋሴ፤ ዔያቶኮ ካሢ ዔያታ ፔና ናይዴም ሙሙዓያ ማዓንዳኔ፡ ፆኦሲ ማኣሪም ዓኒንጎ ባኣዚ ማዒ ሺኢሺንታያ ማዒንዱዋሴ፤ ዬያሮ ዔያቶኮ ዬይ ካሢ ሌሲ ጋርካ ዓኣንቴ ሙዋ ካሢ ማዓንዳኔ፤ ዬያ ሙዔ ዓሲ ሲያ ዒኢታንዳኔ።

5 ዓካሪ ዓኒንሢ ናንጊና ናንጋ ጎዳ ቦንቻኒ ጌሢንቴ ሌዖና ቦንቾ ኬሎናይዳ ዋዋይታንዳይ?

6 ዔያታ ቶሎር ጳሽኬቴያ ጊብፄ ዓሳ ካይሌ ቡኡራጉዲ ዔያቶ ቡኡሳንዳኔ፤ ሜምፖኡሴያ ዔያቶ ዴኡካንዳኔ፤ ዔያታ ቡኡሴ ቆሎ ሆዴ ሙዔም ጉሪ ዓታንዳኔ፤ ዔያታ ናንጋ ኬኤይይዳኣ ዓንጊሢና ዓኣ ቡኡሪንዶ ካይዚ ባቃላንዳኔ።

7 ሜታሢ ዓሳ ኬላ ሄሌኔ፤ ዒሰራዔኤሌ ዓሶ ኮሜ ኮፆ ኬላ ዑኬሢ ዔያታ ዔሮንጎ፤ ዓኒንሢኮ ዳቢንቶና ፑርቱሞናፓ ዔቂያና ፆኦሲ

ማሊያ ከኤዛሢ ዔኤያ ዓሲ፥ ያኦሲኮ ዓያና ዋላ ዓኣ ዓሢ ዠኣኦኦ
ዓሲ ማሢ ዓንሢ ዛጋኔ።

8 ያኦሲ ማሊያ ከኤዛሢ ዔኤያ ካፓንዳጉዲ ያኦሲ ዶኦሪ
ጌሢ፤ ጋዓንቴ ጎይያይዳ ቢያ ፒራ ዒዛሞ ፒሪንቴ፤ ያኦሲኮ ጌኤኦ
ማኣሮይዳ ዒዳንቴሢ ዒዛ ካፒ።

9 ዔያታ ጌባዖኦኔ ዋዶና ዓኣ ዴሮጉዲ ጋፒ ዒኢቴ፤ ያኦሲ ዔያቶኮ
ጎሞ ዛጌ ዴንቂ ዔያቶይዳ ሜቶ ዓጋንዳ።

ዒሰራዔኤሌ ዴሮኮ ጎሞና ጎማ ዔኪ ሙኬ ባይሲንቶ

10 ናንጊና ናንጋ ጎዳ ሂዚ ጋዓ፡- «ዒሰራዔኤሌ ዴሮ ታኣኒ
ዴንቄያና ካፄ ዋይኔ ሶዬና ዓኣያ ዓሲ ናንጉዋ ዳውሌይዳ
ዴንቄያጉዲከ፤ ዒንሢኮ ቤርታሳ ዓዶንሢ ታኣኒ ዴንቄያና ቤርቲ
ቤርታ ካፄ ቤሌሴ ዓኣፒ ዴንቄያጉዲ ታኣሞ ማዔ፤ ዔያታ
ባዓልፔዖሬ ጌይንታ ቤዞ ሙካዖ ዬያ ሻኣካያ ማዔ ፔዖሬ ያኣዛሢሞ
ፔና ዴማሲ ዓኣሢ ዒንጌ፡ ዬያ ዔያታ ናሽካ ያኣዛሢጉዲ ፔኤሮዋ
ዒኢቴያ ማዔ።

11 ዔፕሬኤሜኮ ቦንቻ ካፒጉዲ ባራኒ ዴንዲ ባይቃንዳ፤ ሃይካፓ
ሴካ ሾይሢሮ ለሂሢንታ ጎጶዲሢንታ ሾይቹያኣ ባኣያ ማዓንዳ።

12 ዔያታ ናይ ሾዒ ዴቹቴያ ናኣቶይዳ ፑርታ ዶርዖ ታኣኒ ዓጊ ዋዲ
ኩርሳንዳሢሮ ናይ ባኣያ ዔያታ ዓታንዳ፤ ታ ዔያቶፓ ሃኪ ሺኢከ
ዔቄቶ ዔያቶ ባዴዔ።»

13 ዔፕሬኤሜ ኮሺ ሳዓይዳ ዴኤቂንቴ ሜኤፄ ዓኣፒ ማዒ ታኣሞ
ጴዴ፤ ጋዓንቴ ሃሢ ዔያታ ፔኤኮ ናኣቶ ሃይቢሞ ዓኣሢ ዒንጌ።

14 ናንጊና ናንጋ ታ ጎዳሢዮ! ሃያ ዴሮሞ ዓይጎ ዒንጌ ታ ኔና
ጎንዶይ? ዑሰካፓ ኩርሳ ጎጶና ዴኢቂ ሶርቄዋ ዳንሢና ዔያቶሞ
ዒንጌ!

ያኦሲ ዒሰራዔኤሌ ዓሶይዳ ዋጌ ዋጎ

15 ናንጊና ናንጋ ጎዳ ሂዚ ጋዓ፡- «ዔያቶኮ ፑርቱማ ጌልጌላይዳ
ፔጋዴሢሮ ዒኢካ ታ ዔያቶ ዒፄ፤ ዔያታ ማዴ ፑርቶ ማዶሮ
ታ ማኣራፓ ታ ዔያቶ ዳውሳንዳ፤ ሃይካፓ ሴካ ታ ዔያቶ
ናሽኪንዳዋሴ፤ ዔያቶኮ ሱኡጋኣ ቢያ ዋይዙዋያ ማዔ።

16 ዔፕሬኤሜ ፑርታ ዠባሬና ካኣሚ ፃጶ ሜሌም፡ ዓኣፒ ዓኣፓኒ
ዳንዳዑዋ ሚሢ ማዒ ዓታንዳ፤ ዔያታ ናይ ሾዔቴያ ዒናፓ ዔያታ
ናሽካ ናኣቶ ታኣኒ ዔያቶኮ ዋዳንዳ።»

ያኦሲ ማሊያ ከኤዛሢ ዒሰራዔኤሌ ዓሶ ዛላ ጌዔ ባኣዚ

17 ዔያታ ዓይሢንተባአሢሮ ታ ጽዓዛሢ ዔያቶ ኬኤራንዳኔ፤ ዔያታ ሜሌ ዴሮ ባአካ ቤሲ ባይዚ ሴካ ሃንጋ ሃንታንዳኔ።

10

1 ዒሰራዔኤሌ ዴራ ሚርጌ ዓሜ ዋይኔ ማዔኔ፤ ዓአፓ ዔያቶኩ ዲቤሢ ጎይፆ ሜሌ ጽዓዛም ዒንጎ ባአዚ ዒንጌ ካአሽኮ ሚርጌ ቤሲ ዔያታ ኮሼኔ፤ ሳዓ ዔያቶኩ ኮሽኪ ፆርጎቹ ሳዓ ማዔሢ ጎይፆ ሜሌ ጽዓዛም ዘጎ ዳአቦ ሚዛጲሲ ዔያታ ማዜኔ።

2 ዒና ዔያቶኩ ላምፆ ጎይካ ዓአያኬ፤ ዔያታ ፔ ዳቢንቶኩ ዒንጌንታ ባኮ ዔካንዳኔ፤ ዬያ ሜሌ ጽዓዛም ዔያታ ዒንጎ ባኮ ሺኢሻ ቤዛ ጽዓሲ ሜንሢ ሻሃንዳኔ፤ ሜሌ ጽዓዛም ዘጎ ዳአቦዋ ዔያቶኩ ዒዚ ደይሳንዳኔ።

3 ዴራ፡- «ኦኡኒ ናንጊና ናንጋ ጎዳ ዒጊጨ ቦንቹባአሢሮ ካአቲ ኦኡኮ ባአያ ማዔኔ፤ ዒ ዋንዴ ካአቲ ኦኡኮ ዓአቴያ ዓይጎ ኦኡም ማዳንዳይ?» ጋዓኔ።

4 ሉኡዙሞ ጨአቁሞ ጨአቁ ጨአቁ ጉሪ ባአዚ ጌሰቲ ሺራኔ፤ ዬያሮ ጎሺ ሳዛይዳ ሃአኮ ዋዋዳ ፑርታ ሆኦሪ ባቃላሢጉዲ ዔያቶ ባአኮይዳ ዛላ ዲባኔ።

5 ሳማሪያ ካታሞይዳ ናንጋ ዴራ ቤትዓዌኔይዳ * ናአሪ ማሊሲ ማዞና ሜሌ ጽዓዛር ዒጊጨ ጎጋይቂ ሃይቃኔ፤ ዬያ ጽዓዛኮ ቦንቻ ባይቁሢሮ ዔያታ ዬኤካኔ፤ ዬያ ጽዓዛ ካአሽኪ ዘአሰካ ኮአማያ ማዔ ቁኤሳአ ዒናፓ ዬኤኪ ዒላታኔ።

6 ዬይ ጽዓዛ ዓሶኦሬ ዓጮ ዔውቲ ዴንዲ ዴኤፖ ካአታሢ ቤርቶ ሺኢኪሮ ዒንጎ ባአዚ ማዒ ዒንጌንታንዳኔ፤ ዔፕሬኤሜ ቦርሲንታንዳኔ፤ ዒሰራዔኤሌ ፔ ዋይዜ ዞሮና ዳውሲንታንዳኔ።

7 ሳማሪያ ካአቲ ዋአሢ ዑሢዳ ዴንዲ ዲባጉዲ ዓአዲ ባይቃንዳኔ።

8 ዒሰራዔኤሌ ዴራ ቤትዓዌኔ ጌይንታ ካታሞይዳ ሜሌ ጽዓዛ ካአሽኪ ጎሞ ማዳ ዴጌ ዴጌ ቤዛ ሻሃንታንዳኔ፤ ዔያታ ፔ ጽዓዛም ዒንጎ ባኮ ዒንጋ ቤዛይዳ ዓንጌሢንታ ጋውዲንታ ባቃላንዳኔ፤ ዬኖ ዋዶና ዴራ ዲኮ ኮይላ፡- «ኦና ዓአቹዋቴ!»፤ ጌሜሮ ኮይላአ፡- «ኦና ካንቁዋቴ!» ጋዓንዳኔ።

ጽዓሲ ዒሰራዔኤሌይዳ ሜቶ ዓጋንዳያ ማዒያ

* 10:5 ቤትዓዌኔ፡- ዬኖ ጌይፃ ዔብሬ ዓሶ ሙኡጮና «ፑርቱሞኮ ማአሪ» ጌይሢኬ።

10:8 ሉቃ. 23:30፤ ዮሃ. ዮፔዳ 6:16።

9 ናንጊና ናንጋ ጎዳ ሂዚ ጋዓኔ፡- «ዒሰራዔኤል ዴራ ጊቢዓይዳ ጎሞ ማዳማፓ ዓርቃዖ ሃኖ ሄላንዳእና ታና ያዪሲሂፓ ጊንሂሞ ጊይባእሴ፤ ጊባዖኦይይዳ ፑርቶ ማዴ ዓሶ ያልዚና ታኣኒ ኩርሲሲባኣዓዳ?

10 ታኣኒ ኮዔ ዋዴና ዔያቶ ፀንቃንዳኔ፤ ሜሌ ዴራ ቢያ ቡኪ ዔያቶ ባይዛኒ ዔቃንዳኔ፤ ጳንጨፍ ማሂ ዔያታ ማዴ ጎሞ ዛሎ ሜታ ዔያቶይዳ ኬዳንዳኔ።

11 «ዔፕሬኤሜ ሃያኮ ቤርታ ሃኣኮ ሺርኪ ዔሬ ማርኬ፤ ጋዓንቴ ታኣኒ ዔያቶኮ ሚዛጶ ባቃኖይዳ ቃሞባራ ጊሣንዳኔ፤ ያዲ ማዔም ዪሁዳ ጎሽካንዳኔ፤ ያይቆኦቤ ናኣታ ቢያ ዋኣዲንቴጋፓ ሳዖ ጎሽኪ ሺኢቻንዳኔ፤

12 ታኣኒ፡- ሩባካሪ፥ ሻፖ ጳሉዋቴ፤ ዲሉሞ ዒኢካ ዒንሂሞ ዜርቁዋቴ፤ ዴማ ዴማ ካራና ላኣሚንቴሞ ናሹሞ ዓኣፒ ዒኢፓ ጮኦሩዋቴ፤ ታና፥ ዒንሂኮ ያኦዛሂ ባንሂ ዒንሂ ማዓንዳ ዋዳ ሃይሾ ሃሂኬ! ታኣኒ ሙኪ ፒዜ ዋጌ ዒንሂ ባኣካ ዋጊንታንዳጉዲ ማሃንዳኔ፤ ጌዔኔ።

13 «ዒንሂ ጋዓንቴ ዒንሂ ዋልቆና ዒንሂኮ ዔርቴ ያሎ ዓሶ ሚርጉሞና ጉሙርቁሂር ፑርቱሞ ዜርቁ ጌኔ ማዶ ጮኦሪ ዒንሂ ዔኬኔ፤ ዒንሂኮ ሉኡዙሞ ዓኣፖ ዒንሂ ዴንቂ ዔኪ ሙዔኔ።

14 ዒንሂኮ ዴርይዳ ዴኤፒ ያልዚ ማዢንታንዳኔ፤ ዒንሂኮ ዋርዲዮ ማሂ ኬልቂ ኮሾና ዴፃ ቢያ ሻሂንታንዳኔ፤ ካኣቲ ሺልማኣኔ ቤትዓርቤኤሌ ካታሞ ያሊ ሻሂ፥ ዒንዶንሂ ናኣቶና ዋላ ሳዓ ጳዲሲ ዳኣዲ ኩርሰሂጉዴ ባኣዚ ዒንሂዳኣ ማዲንታንዳኔ።

15 ቤኤቴኤሌ ካታሞይዳ ናንጋ ዴሬዮቴ! ዒንሂ ማዴ ዴኤፖ ጎሞ ዛሎና ዒንሂዳ ዪያጉዴ ባይሲንታ ሙካንዳኔ፤ ያላ ዓርቃኣና፥ ሃጊ ሳዖኮ ዴጊጫ ዘቃኣና ዒሰራዔኤሌ ካኣቲ ኔጉዋዖ ሞርኮ ኩጫ ሃይቃንዳኔ።»

11

ያኦሲ ዒዛኮ ዴራ ዋይዘ ዒፃቴያ ናሽኬ ናሹሞ

1 ናንጊና ናንጋ ጎዳ ሂዚ ጋዓኔ፡-

«ዒሰራዔኤሌ ሃጊ ናይ ዓኣንቴ ታኣኒ ናሽኬኔ፤ ታ ናኣዚ ጊብፂፓ ታኣኒ ዔኤሌኔ።

2 ጋዓንቴ ታ ዴራ፥ ዒሰራዔኤሌ

ባሺ ታ ባንሂ ዑካንዳጉዲ ታኣኒ ዔያቶ ዔኤላዛ

ሃቸም ታ ጊዳፓ ሃኪ ሃኪ ዔያታ ዴንዴኔ።
 ባዓኣሌ ጌይነታ ሜሌ ፆኦዞም ዒንጎ ባኮ ዒንጊያንታ
 ዬያ ፆኦዞ ማሊሲ ኮሾና ባኮም ዑንጀ ጨቢሺያ ዔያታ
 ሃሽባኣሴ።

3 ዔፕሬኤሜኮ ኩጮ ዓርቂ ታኣታሲ
 ሃንቲሢ ዔርዘሢ ታናኬ፤
 ዔያታ ጋዓንቴ ታኣኒ ዔያቶ ፓሢሢ ዔሪባኣሴ።

4 ዓሲ ዓሲ ሚጨነታ ሚጨነቲሢና
 ናሹም ካኒ ቢራታና
 ታኣኒ ዔያቶ ጎቺ ዓርቂ፤
 ዔያቶኮ ባቃና ዓኣ ቃንባሮ ዔኪ ሸኢሸ
 ታኣኒ ታኣሮ ሂርኪ ጌይ ዔያቶ ሙኡዜ።»

5 «ዔያታ ጋዓንቴ ታ ባንሢ ማየ ዒፃሢሮ ጊብፄ ዓጮ ማዒ
 ዴንዳኔ፤ ዓሶኦሬ ካኣቲያ ዔያቶ ዎይሢ ማዓንዳኔ።

6 ሞርኮኮ ፆሎ ዓሳ ካታሞ ዔያቶኮ ፆላንዳኔ፤ ካታሞ ጌሎ ካሮዎ
 ሜንሣንዳኔ፤ ዔያቶኮ ፑርቶ ዘርቲፃኣ ጉሪ ማዒ ዓታንዳኔ።

7 ታ ዴራ ታ ባንሢ ማየ ባሽንቲ ላምየ ጎይካ ዔቄኔ፤ ያዲ ማዔቲያ
 ዴኤፒ ማዒሢ ባንሢ ዔያታ ዒላታ፤ ጋዓንቴ ማሊያ ፔቴይዳ
 ዔቄሴይ ፆኦኒያ ባኣሴ።»

8 «ዔፕሬኤሜ! ታ ኔና ዎዲ ሃሻንዳይ?
 ዎይቲ ታኣኒ ኔና ዓኣሢ ሜሌም ዒንጋንዳይ?
 ዓዳኣማና ፄቦይሜ ካታሞናይዳ ታኣኒ ማዴ ጎይያ
 ዎይቲ ታኣኒ ኔጊዳ ማዶንዶይ?
 ታኣኒ ኔና ናሽካ ናሹማ ኮሺ ዴኤፒታሢሮ
 ዬያ ቢያ ታ ማዳኒ ዳንዳዑዎሴ።

9 ታኣኒ ዒንሢ ባኣካ ዓኣ
 ዴማዴ ፆኦሲ ማዓንዳኣፓዓቲም ዓሲቱዎሴ።
 ዬያሮ ታኣኮ ባይዛ ዳጎ ታ ዒንሢዳ ኬይሳዓኬ፤
 ላሚ ታኣኒ ዔፕሬኤሜ ባይዛዓኬ፤
 ታ ዳጎና ታኣኒ ዒንሢ ባንሢ ዬዓዓኬ።

10 «ታኣኒ፤ ናንጊና ናንጋ ጎዳ ዔያቶ ዓውሳኒ ጉዳ ዘበጉዲ ጉዳዛ
 ዔያታ ታ ጊንያ ዬዓንዳኔ፤ ታኣኮ ናኣታ ጎይቂ ጎይቂ ዓባ ጌላ ባንፃፓ
 ዬዓንዳኔ።

11 ካፒጉዲ ጊብፆፓ፡ ዶኦሌጉዲ ዓሶኦሬፓ ባራኒ ባራኒ ዔያታ ዩዓንዳኔ፤ በርታ ዔያታ ናንጋ ኬኤፆ ማሂ ታኣኒ ዔያቶ ጌልዛንዳኔ፤ ዬያ ጋዓሂ ታና፡ ናንጊና ናንጋ ጎዳኬ።»

ፆኦሲ ፔ ዴሮይዳ ዓገ መቶ

12 ናንጊና ናንጋ ጎዳ ሂዚ ጋዓኔ፡- «ዔፕሬኤሜ ሉኡዙሞና፡ ዒሰራዔኤሌያ ጌሺሂና ታ ኮይሎ ማንጊ ዔቄኔ፤ ዩሁዳኣ ፆኦሲሞ ዓይሂንቱዋያ ዒዚ ጉሙርቃ፡ ዴማዴሂያ ማከ ዒፃያ ማዔኔ።»

12

1 «ዔፕሬኤሜ ዠባሬ ዓርቃኒ ኮዒ ኬሎ ጉቤ ዓባ ኬሰካ ዛሎ ዠባሮ ዳውሴ ጎይሂ ጉሪ ዓቴኔ፤ ሉኡዙሞና ጌኔ ማዶና ዔያታ ሚርጊሼኔ፤ ዬያ ሌሊቱዋንቱ ሪሚቶ ዛይቶ ጊብፆ ዓፎ ዔያታ ዳካኔ።»

2 ናንጊና ናንጋ ጎዳ ዩሁዳ ዴሮ ማከ ጌሰታ ጌኤሲ ዓኣኔ፤ ያይቆኦቤ ናኣቶሞ ዔያታ ማዴ ማዶ ጎይፆ ማቶ ዓጋንዳኔ፤ ዔያታ ማዴ ፑርቶ ማዶጉዴያ ዔያቶሞ ዒዚ ማሂ ጨጋንዳኔ።

3 ያይቆኦቤ ሃጊ ዒንዶ ጎጳ ዓኣፆ ሜንቶ ባጎ ማዔ፡ ዒዛኮ ጌርሲ ቢሪ ኬዳኒ ዲንጊርዡ ዓርቄኔ፤ ዒዚ ዑጌሰካፓ ሃሃ ፆኦሲና ማሹሞቦ ዓርቃፆ «ታ ኔና ሃሻዓኬ» ጌዔኔ፤

4 ፆኦሲኮ ከኢታንቻሂና ማሹሞቦ ዓርቄ ዒዚ ባሼኔ፤ ዒዚ ዒማና ዩኤኪ፡ ዩይ ከኢታንቻሂ ዒዛ ማኣራንዳጉዲ ሺኣቄኔ፤ ሜሌ ኬሊና ሃሃ ፆኦሲ ዒዛ ቤኤቴሌይዳ ዴንቂ ዒዛና ጌሰቴኔ።

5 ቢያ ባኮ ዋይሃ ጎዳ ማዔ ፆኦዛሂኮ ዴማዴ ዔርቶ ሱንፃ ናንጊና ናንጋ ጎዳኬ።

6 ዬያሮ ዒንሂኮ ፆኦዛሂ ባንሂ ማዑዋቴ፤ ናሹሞንታ ፒዜ ዋጌ ዋጊሂንታ ኮሺ ዶዲሺ ዓርቄዋቴ፤ ዒንሂኮ ፆኦዛሂ ዒንሂ ማኣዳንዳያ ሄላንዳኣና ጊቢ ዶዴ ካፑዋቴ።

7 ናንጊና ናንጋ ጎዳ ሂዚ ጋዓኔ፡- «ዒሰራዔኤሌ ዴራ ጌሺ ማኮ ባኣዚና ኮርማ ካኣናኔ ዓፎ ኮርሞ ዓሶጉዲ ማዔኔ፤ ዬያና ዔያታ ዓሶ ጌሺ ጌሺ ሺራኔ፤

8 ዔፕሬኤሜ፡- «ታኣኒ ፆርጎጨኔ፡ ዉዴንቴኔ፤ ታኣኒ ላቢ ዴንቄ ሃያ ቆሎይዳ ቢያ ዳቢንቲ ማዒ ታና ጎማንዳ ባኣዚ ጳዴንዴሞሴ» ጌይ ጌይ ፆቶርቄ ጌሰታኔ።

9 ጋዓንቴ ጊብፄ ዓጫፓ ዒንሢ ዔኪ ኬሴሢ ታና፡ ናንጊና ናንጋ ጎዳ ማዔ ፆኦዛሢ፤ ወልሾ ደማ ደዒ ቦንቾ ቦንቾና ዓፒላና ማዞና ማኣሪዳ ዒንሢ ናንጌ ጎይፆ ገንሣ ታ ዒንሢ ዒኢካ ናንጊሻንዳ።

10 «ታ ማሊፆ ኬኤዛ ዓሳ ዔያቶም ኬኤዛንዳ ባኮ ታኣኒ ኬኤዜ፤ ሚርጌ ባኣዚ ፔጋሲ ታኣኒ ዳዌ፤ ዔያቶ ታ ማሊፆ ኬኤዛ ዓሶ ዳንጎና ኮኣኪንሢያኣ ታኣኒ ኬኤዜ፤

11 ዔያ ታኣኒ ቢያ ማዳንቴ ጌሌዓደይዳ ሜሌ ፆኦዞም ዔያታ ዚጋ፤ ዔያ ሜሌ ፆኦዞም ዚጋ ዓሳ ፓሡዋ ዓሲ ማዓ፤ ዋፓኖ ጌልጌላይዳ ዔያ ፆኦዞም ዒንጎ ባኣዚ ማሢ ዔያታ ሹካ፤ ጋዓንቴ ዔያቶኮ ዔይ ዒንጎ ባኮ ዒንጎ ቤዛ ዶዒ ቡርሺንቴ ጎሺ ሳዛይዳ ኩሊንቴ ሹቺ ማዒ ዓታንዳ።»

12 ኦኦኮ ዓዳሢ፡ ያይቆኦቤ ሜሶፖታሚያ ፑኒ ዴንዴ፤ ዒኢካ ላኣሊ ዔኪር ጌይ ማራይ ሄንቃ ካራሚ ማዓ።

13 ናንጊና ናንጋ ጎዳ ዳኬ፡ ዒዛኮ ማሊፆ ኬኤዛሢ ዛሎና ዒሰራዔኤሌ ደር ጊብፄፓ ዔኪ ኬሴ፤ ዔያ ዒዛ ማሊፆ ኬኤዛሢ ዛሎና ዔያቶ ዒዚ ማኣዳ።

14 ያዲ ማዓቴያ ዔፕሬኤሚ ናንጊና ናንጋ ጎዳ ሚርጌና ዳጋሴ፤ ዔያታ ዳቤ ዳቢንቶ ዛሎ ፆኦጪንታንዳ፤ ዒዛኮ ሱንፆ ዔያታ ጫሽኬሢርዋ ሜታ ዔያቶይዳ ዓገንታንዳ።

13

ዒሰራዔኤሌይዳ ዋጊንቴ ጋፒንሢ ዋጊ

1 ዔፕሬኤሚ ጌሰታኣና ዋይዛ ዓሲ ቢያ ዒጊጪ ጎጎጋይቃ፤ ሃሢ ጋዓንቴ ዒኢኒ ባዓኣሌ ጌይንታ ሜሌ ፆኦዞም ዚጊ ጎሜ ማዳሢር ሃይቄ።

2 ዔያ ሃሾ ዒዲ ጎሞ ማዲፆ ዔያታ ዲቢሼ፤ ዔያታ ፔኤኮ ቢር ዓንጎ ሼኤሽ ዔያቶም ፆኦሲ ማዓንዳያ ኮሼ፤ ዔይ ቢያ ዓሲ ፔ ኩቻ ማዜ ባኣዚ፤ ዔያ ዓሲ ኩቻ ማዢንቴ ባኮም ዓሳ ዒንጎ ባኣዚ ዒንጊ ሄርቂያ ሄርቂ፡ ዔያ ናኣር ማሊሲ ኮሾና ባኮም ዚጋንዳጉዲ ዔያታ ጋዓ።

3 ዔያር ዔያታ ጉቴና ጴዳ ሊኢሎና ፆልኬናጉዲ ጉሪ ባይቃንዳ፤ ሃኣኮ ሺርኮ ቆይዳይዳፓ ዢባሬና ፒዒንቴ ዴንዳ ዲልባጉዲ፡ ገንሣ ሃሣ ፑልታ ካራና ኬሰኪ ዴንዳ ጩቢጉዲ ዴንዲ ዔያታ ባይቃንዳ።

4 ናንጊና ናንጋ ጎዳ ሂዚ ጋዓኔ፡- «ጊብፄ ዓጫፓ ዒንሢ ዔኪ ኬሴሢ፡ ናንጊና ናንጋ ጎዳ ማዕሢ ታና ፆኦሲኬ፤ ታጊዳፓዓቲም ማሌ ፆኦሲ ዒንሢኪ ባኦሴ፤ ዒንሢ ዓውሳሢያ ታና ሌሊኬ።

5 ዬያ ማሎ ዳውሎ ዓጮይዳ ዒንሢኪ ቶኦኮ ዛጊ ማእዴሢ ታናኬ።

6 ጋዓንቲ ኮዡ ዓጮሎ ሙኪ ዒንሢ ጌላፖ ሙይ ሚሸኪ ሚርጌና ፆቶርቄኔ፤ ታናኦ ዒንሢ ዋሌኔ።

7 ዬያር ታኦኒ ዒንሢም ዘቢ፡ ጊንሣ ሃሣ ጎይሢዳ ካቲ ዴዔ ማእኪ ማዓንዳኔ።

8 ናይ ዔውቲ ፑርታ ቦፖጉዲ ማዒ ታ ዒንሢ ማእሳንሣንዳኔ፤ ሾኦሊ ሾኦሊ ታ ዒንሢ ላኦላንዳኔ፤ ሙሙዓ ዘቢ ታ ዒንሢ ኮይላ ማዓንዳኔ።

9 «ዒሰራዔሌ ዴሬዮቴ! ታና፡ ዒንሢ ማእዳሢ ዑፃ ፑርቲሞና ዒንሢ ዒቁሢር ታ ዒንሢ ባይዛንዳኔ፤

10 ካኦቲንታ ሱኡጊንታ ዒንሢም ዒንጊንታንዳጉዲ ዒንሢ ፆኦጮኔ፤ ሃሣ ሂዳፖ ዒንሢ ዓውሳ ካኦቶንታ ማእዳ ሱኡጎንታ ዋካዳፖ?

11 ታኦኒ ዳጋዲ ካኦቶ ዒንሢም ዒንጌኔ፤ ጋዓንቲ ታኦኮ ዴኤፖ ዳጎና ጊንሣ ታ ዔያቶ ባይዘኔ።

12 «ዔፕሬኤማኮ ዳቢንታ ናካኦና ኩሊንቲኔ፤ ጎማኦ ዒዛኮ ፃኦፒንቲ ዓዲንቲኔ።

13 ሾይቺ ዓዲንቲ ላኦሊጉዲ ዒዚ ሜታዳንዳ ዋይ ዬዓንዳኔ፤ ዒዚ ሾይንታ ዋዳ ሄላዛ ዒንዶ ጎጳፓ ኬዶ ዒፃ ናይጉዲ ዔኤያ ማዕኔ።

14 ሳፖ ዴሞ ዋልቃፓ ታ ዔያቶ ዓውሳንዳኖ? ሃይቢፓ ታ ዔያቶ ዳቂሻንዳኖ? ሃይቢዮ! ኔኤኮ ዋዲ ኩርሳ ባካ ዋካ ዓኦይ? ሳኦ ዴሚዮ! ኔኤኮ ባይዚፃ ዓንካዳይ? ታኦኒ ዔያቶም ሚጨንቲንዲዋኦቃይ፤

15 ዒዚ ፔኤኮ ጌርሲንሢ ባኦካፖርሳቺ ማዕቲያ ናንጊና ናንጋ ጎዳ ዳካ ፑርቶ ዠባራ፡ ዓባ ኬሰካ ዛሎፓ ዔቃሢ ዒዛ ዓጮ ሙካንዳኔ፤ ዓልቃ ዋኦፃ ዓልቆ ዒፃም፡ ዋራ ዒዛኮ ሚጫንዳኔ፤ ዬይ ዠባራ ዒዛኮ ዓኦ ሚዛፅ ባኮ ቢያ ፒዒ ዔኪ ዴንዳንዳኔ።

16 ሳማሪያ ታኦም ዋይዘ ዒዒ፡ ማዴ ዳቢንቶ ዛሎ ፆኦጨንታያ ማዓንዳኔ፤ ዒዛኮ ዴራ ፆልዚና ኩዳንዳኔ፤ ዳኮ ናኦታ ሳፖይዳ ጳዲንቲ ዳኦዒንታንዳኔ፤ ጎጳይንዳሢኮዋ ጎጳ ዳርዚንታንዳኔ።»

14

ዒሰራዔኤሌ ዳራ ፆኦሲ ባንሢ ማዓንዳጉዲ ሆሴዔ ፆኦጩሢ

1 ዒሰራዔኤሌ ዳራዮቱ! ባንሢኩ ጎማ ባንሢ ደቂ ዣኣሊሴያተሢ ርንጊና ርንጋ ጎዳ ማዔ ባንሢኩ ፆኦዛሢ ባንሢ ማዕቀቱ።

2 ባንሢ ቡኡፃንዳ ባኮ ዔሪ ርንጊና ርንጋ ጎዳ ባንሢ ማዕቀቱ፤ ሂዚ ጎዑቀቱ፡ «ኦኡኮ ጎሞ ቢያ ዓቶም ጌዔ፤ ኦና ማኣሪ ዔኬ፤ ኦኡኢያ ኦ ዳንጎና ኮሺ ዓኣፒ ማዔ ጋላታ ኔኤም ሺኣሻንዳ።»

3 ዓሳኦሪ ኦና ዓውሳዓኬ፥ ፆሎ ፓራሢያ ኦኡኢ ጉሙርቁዋሴ፤ ሃይካፓ ሴካ ኦ ኩቻ ኦኡኢ ማዜ ባኮ «ፆኦሲ» ጌይ ኦ ዔኤላዓኬ፤ ርንጊና ርንጋ ጎዳሢዮ! ዜኤር ርኣቶ ኔኤኢ ሚጪንታያኬ።»

ፆኦሲ ጎሞ ዓቶም ጋዓንዳያ ማዒፆ ኬኤዜሢ

4 ርንጊና ርንጋ ጎዳ ሂዚ ጋዓኦ፡-

«ታ ዳርኮ ጉሙርቁንቱዋያ ማዒፆ ታኣኢ ጊኣጊሺ

ታ ባንሢ ዔኪ ማሃንዳ።

ዳጋ ታኣኮ ዔያቶ ባንፃፓ ማዔሢር

ታኣኢ ታ ሺኔና ጉሪ ዔያቶ ርሽካንዳ።»

5 ዒሰራዔኤሌ ዳርኮ ታኣኢ ፆፆ ዓልኬ ማዓዛ

ዔያታ ቡኒጉዲ ቡርንዳ፤

ሊባኖኦሴ ሚፆጉዲ ፃ፲ ዔያታ ዳካንዳ።»

6 ዓንታ ዔያቶኮ ዋርቃንዳ፤

ዛይቶ ሪሚቶጉዲያኣ ዔያታ ሚዛ፲

ሃሃ ሊባኖኦሴ ዳኤሎጉዲ ኮሺ ሳውሞ ዓኣያ ማዓንዳ።»

7 ጊንሢ ማዒ ታ ሺቦ ዳሞ ዔያታ ጌላንዳ፤

ሃጊ ባቃላ ሃኣኮጉዲ ዔያታ ዓኣዒ ሚዛ፲ንዳ፤

ዋይኔጉዲያኣ ዔያታ ቡርንዳ፤

ዔያቶኮ ሳውማ ሊባኖኦሴ ዋይኖ ዑዙሲጉዲ ዔርቱያ

ማዓንዳ።»

8 ዔፒሬኤሜ!

ሜሌ ፆኦዞና ዋላ ታኣኮ ዓይጎ ካኣሚ ዓኣይ?

ዒንሢኮ ሺኢ፲፱ ዋይዛሢንታ ቶኦኮ ዒንሢኮ ዛጋሢ ታናኬ፤

ታኣኢ ቢያ ዋይ ዋርቂ ጎይሢ ዳዓ ዚቢቂጉዲኬ፤

ዒንሢ ዓኣፒሳሢያኣ ታናኬ።»

ጋፒንሢ ሃይሴ

9 ዓራቶ ዓላ ዓሲ ዩንሢ ባኮ ዒና ዔካንዳኔ፤ ማሊ ጰቂሣ ዓሲያኣ
ዔራንዳኔ፤ ናንጊና ናንጋ ጎዳኮ ጎይፃ ፒዜኬ፤ ሂሎ ዓሳ ዒዞና ሃንታኔ፤
ጎሞ ዓሳ ጋዓንቴ ዱቂንቲ ዒኢካ ሎሎኦማኔ።

ጌኤዢ ማፃላፖ

The Holy Bible in the Maale language of Ethiopia, using Ethiopic script

copyright © 2008 The Word for the World International and The Bible Society of Ethiopia

Language: Maale (Male)

Translation by: The Word for the World

Contributor: Bible Society of Ethiopia

ጌኤዢ ማፃላፖ

Maale Full Bible

The Word For The World International

Bible Society of Ethiopia

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-13

PDF generated using Haiola and XeLaTeX on 26 Jul 2025 from source files dated 13 May 2025

bbcfb90a-3ae3-5452-983d-6c4c02375929